

## Wout bedietet ve ons Menneste dout Ete?

(humoristisch-wissenschaufleche Ophoundlenj)

Wout bedietet ve ons Menneste dout Ete? Jevtet ewaopt söne Jerechte, dei moun ous „typisch mennesche Tjetj“ nanne koun? Uba e etj mie met dese Frouge beschafftje wou, erlaubt mie, dout etj en dese Ophoundlenj ein Jletjheitszeichen teschen Menneste en Plautdietsche sat, denn derjch onse Woundajeschejcht send wie oula vebunge, besondasch wout dout Ete ounjet. Alsö jelt fe dese Jeschejcht, etj betön blös fe dese Jeschecht: Plautdietsche = Menneste.

Alsö wout bedietet ve ons Menneste dout Ete? Etj wurd saje – oules, öda mest oules en dout es uk göt sö! Werom, woat jünt luta dietlejch woare. Wout fe de Französe – de Eifelturm, de Croissant en de Pogschenjtjes, fe de Italiener – de La Scala, Pasta en Siesta, fe de Russe – Patriotismus, Bortsch en Vodka, fe de Dietsche – Fötboll, Beija en ehre Mäschine send – dout send fe ons Menneste onse Tweiback, Krüseltjes en ewahaupt dout Ete! Endönt wönt: ous Borscht, öda Pelmeni, Pizza öda Wrenjtjes – wie nehme beliewjet Ete en onse Tjetj op, „veveinre“ dout mot Schmages öda ne extra Porz Fleisch, Fat en Tjis en O, Wunda - nü esset oul menneschet Ete! En eint koun etj jünt vesejchre - ons Ete es ons heilejch!

Wann etj jünt froage wurd, worewa unjerhöle sech zwei, drei öda uck meija Menneste, wann sei mul töpkume om Leiwste? Ewa dem Glöwe, wurd jie saje. Jo, uba etj sie mie sejcha, dout mest jiedra von jünt dout noch erjenze wurd: en ewrem Ete. De Frühes vetale einounda, wout sei scheinret te Meddach öda Unkost jekouckt habe en tüsche Rezapte üt en de Manna dorewa, wout ehre Früh wohl scheinret te Meddach jekouckt haft en wumet sei sejch futs dem Buck vollschlenje woare! En wem wundat dout? Jevtet ope Ed scheinret Ete, ous Rolkucke mot Rebüse, Nachtbee- en Jünebeere Wrenjtjes mot seittem Schmages, scheinret ous Nachtbee – en Jünebeerepwrenj, Prshti öda Ploutz üt dese Beere mot fresche Maljtj? Etj jleiw, tjeina von jünt wout bestriede, dout det dout baste Ete ope Ed es! En rajcht ha jie! Wannet einen menneschen Goude Eden jewe wurd, dann sie etj mie sejcha,

houd Eva Adam nejch motem Oupel, sonda mot eine Rebüs mot Rollkucke öda mot Jünebeere- öda Nachbewrenjtes mot Schmages velockt!

Jerajchtejchtjesthoulwa mot etj hea töjewe, dout wie einstje Jerejchte habe, von dei mie de Tjwiel em Mül nejch töprant. Dotö tall etj: Mehlbrie (dout Leibjerecht von mienem Vuda), Jlepstjieltje (dout Leibjerecht von miene Muta) domet haft sei mienem Neffe grötjefödat. Sö ous hei Öma besetje koum, segoa ous hei oul befriet wea, jenjt Öma ous eschtet ene Tjetj en kouckt fe ahm Jlepstjiltje! Etj denjtj dese Jerejchte kratjt sö uck ous Tjlitamaljsche Moos, Suremaljtjsche- en Botamaljtjsche Moos send üt Ewalewensstrategie enstune, Maljt en Mehl houd moun foust ema. Wundere det mie eint, dout det Ete einstje Menneste uck fondog noch schmatjt. Wie Menneste send echt tjeine Kostverachta, etj wurd segoa saje – wie send Oulesetasch. Mounchmul beschlijcht mie segoa sö ein heretescha Jedanke, dout onse Veavorasch sejch wömejlejjch dem menneschen Glöwe dowejen ounjeschlute habe, wielset hea fet Ete tjeine besondere Rejel en Veböte jevt! Moun douf oules Ete, nuwout eina Lost haft, uck Schwiensfleisch, hauptsache moun besept sejch nejch ous en Schwien!

Wann etj ewret mennesche Ete schriew, kum etj nejch dobie rom ons Jebacknes te erwähne: Tweeback, Krüseltjes, Pepanet, Pljuschkes, Boabat en veschiednet oundret Hefjebacknes douf en tjeinem menneschen HüS fehle, kratjt sö ous uck Rebspea, Selfleisch, Lewa en Retjawourscht! Koune sejch domet de mukaje Pogschenjtes vone Französe, dei sejch huchnesejjch wö sei mul send, te de baste Kokasch ödas saj wie leiwe Tjetjasch<sup>1</sup> en ehre Tjetj te de ütjelesenste Tjetj, dei et ope Welt jevt, tale, fejjletje? Bie wiedem nejch!

Bot ve korte Tiet, muck mie einet blös Sorje: onse mennesche Tjetj es doch zimlech fatejjch en kallorieretj, sö dout moun ous Früh eiwejjch motem Heiftegold te tjampfe haft! Uba dout es nü Sprie von jestre!

---

<sup>1</sup> He mot etj ous selbsterannte Frühesrechtlerin bemotje, dout etj dout ziemlejjch diskriminiert fenj, doutet en onse plautdietsche Sproak tjein Wuat fe einen Moun jevt, dee sö ous eine Tjetjsche koucke det! Mienameinenj esset Tiet em 21te Joahundat dese Onjerajchtejchtjet ein Enj te moake! Etj schlu hea dout Wuat Koaka öda Tjetja veh.

Frühes, wie tjene oputme! De Wissenschaftla habe en eine Studie Beweise dofea jefunge, dout onse Intelligenz dretjt wout motem Heiftegold te döhne haft! Je breida de Heifte – desto tjetja send wie!

Juhu! Etj hab oul ema jewest, dout etj eine Intelligenzbestie sie! En ne mien Heiftegold te udeile es min IQ Wert mindestens 150 wann nech 160 huch. En wout dout scheinste en interessanteste es, nemmt dei motem Ella uck noch tö! Sö ein Jletj!

Ewahaupt sie etj ene Meinenj, dout wie Menneste eine bütaordentleijch kluge Voljtsgrupp send. Onse Muttasch speade wohl instinktiv, wout ons Voljt tem üterwählten Voljt make koun – dout Ete! Sei „feveinade“ dout sö seija ous de Lewensomstände dout töleite. En wout soul etj saje? Blös sövel: Dout es dens jelunge! Eine wiedere wissenschouftleijche Studie haft rütjefunge, dout de Menneste en Amerika de detjste Bevoljterjenjschecht es en etj guh dann dovon üt, dout dei uk de breideste Heifte habe. En etj jleiw, wie habe de Chance, wann wie ons en betjstje ounstrenje, dennis entehule öda segoa noch te ewahule. Wie send doch nejch domma ous de Amis, nejch wo? Alsö te wönem Entschluss kum wie hea? Wie Menneste send nejch blös de baste Kokasch-Tjetjasch, wie send mot huge Werschänjleijchtjtet uck noch eine vone tjetjste Voljtjsgrupp op onse Ed! Danke Gott ve det Jeschenjtj!

Wö wejchtjch fe ons Menneste dout Ete es, hab etj nejch mo eimul oum ijnem Leiw jespeat. Sö wejchtejch, dout segoa de eschte Stried mot mienem Moun wejenem Ete pässeed, do send wie tjeine Ütnahme. Wö etj ne velle Jespräche mot onse Frühes foustjestallt hab, wea en es dout ene meschte Ehen de ütschlahjehewende Grund. Hetö mot etj saje, dout dout „Spezäre“ te miene Jügendtiet noch nejch sö einfach wea ous nü. Donn wea dout noch nejch Möd, dout moun futs bim eschte Traffe ene Bassemkuma en Tjent moake deid öda dout moun escht 3-5 Joa töp lewd, e moun seich befriet öda uck nejch. Ne, domuls wea dout oules noch vell, vell sittlejcha en strenja.

Min Moun en etj lede ons op einem Nijoschfast tjane en de gounze sibirischen Wenta lang, koun hei jiedren Sennuwend 60 Km. te föt

en mot Poputkes ne mie tem „Spezäre“. Etj deschd, sö ous dout onse Tradition es, ve ahm ous Goust dout baste Ete op, dout wie houde. Hei eit uba moa seija wenejch en meind ema, dout hei nejch vell Ete bruckt. Sö jreinschnuwlejch ous etj wea, ound etj nejch, dout det blös eine Strategie von ahm wea, dout des jeretna Tjedel mie henjret Leicht fead! Ous wie sö ein holwet Joa späzeht houde, meind hei, dout hei nejch noch eine Wenta sö wiet te Föt gune en mot Poputkes foure wull en held om mien Hound oun.

Wie befriede ons en nü jenjtj de Kutadonz lös. Wie tjande je ons omjeretjend onstjefe einen Mönat en dotö uck noch blös vone baste Sied. Wann wie Plune fe de Tjötjunft schmiede deide, meind hei emma: - Sö ous dü sajst, sö woutet uk sene. Houd etj donn breidere Heifte jehout houd etj futs jewesst, dout dei Souts en Woarhet sö te vestune es: - Sö ous etj saj, so woutet uck sene en basta!

Ous etj tem eschtemul fe ons te Unkost Eja jebrud houd, koumet te onsem eschten Striet. Etj uhnd donn noch nejch, doutet nuhe bie ons noch veele Striedarie wejenem Ete jewe wurd. Mitlerweile koun etj dorewa ein detjet Buck schriewe, uba den eschte Striet hab etj ve emma behöle. Mie wort en dem Ugenbletj schlogutejch kloa: „späzere gune“ es nejch = befriet sene! Dout Wuat „Romantik“ es em „Jestre“ jeblewe.

Etj houd te Unkost ve mie ein Ej jebrut en ve ahm twei. Sö ous etj dout von Tüs jewannt wea: ve Ma en mie brud wie ema ein Ej en ve Pa twei. Dou stund je uck noch meija opem Desch: selbstjebacknet Bröt en Schmound, Bota en Wrenj. Tem drenjtje goufet wö ema Prips.

E etj mie veseine houd, (etj weit nejch meija, wout etj noch üte Maljtjbenjt hulle wull) houd mien Moun siene twei Eja veschlunge, uck mine Schiew we ladejch jefejt...Etj we sö vebleft, dout etj em eschte Moment nejch eimul wes, wout etj saje sull. Schlieslejch stotad etj: - Wu es min Ej jeblewe? – Etj hab dout opjejete, - meind hei seelenröhejch. - Dü? Mie wea, ous wann mie wea opem Kop jeschlouge houd. Von sö vell Onfeschemtheit en Egoismus – veschluget mie de Sprock.

– Det nächste Mul wuscht weite, dout dü meija Eja brude motst, - meind mien Moun en eit, ous wann nuscht pässet wea, wieda.

– Dü sedsd doch ema, dout dü nejch vell Ete bruckst? – Malo schto wout etj jesajcht hab, schliessleisch en entleisch wull etj die te Früh nehme en ene Leiw send oule Medel erlaubt! Etj sie doch tjein Dommkop, etj docht, wann etj die wies, wöfell Ete etj bruck, befriehst dü die nienech mot mie!

Une ein Wut te saje, drejd etj mie om en jenjt netjsche. Dout hei nejch twei, sonda 10 Eja mot jeretjadet Schenjtjefleisch ene houlwe Poun von Schmolt jebraht bruckt, word etj escht eine korte Tiet luta en. Eint weit etj uba gounz jenoa, houd etj op mienem Moun jehorjcht en houd jiedesmul, wann hei seich om Mittanacht ne gröte Porz Eja mot jeretjadem Schenjtjefleisch brud, metjeiete – wea etj vell eja sö intelligent jeworde, ous etj fondog sie! Etj houd flejcht nejch meija derjche Dea jepoust – uba dofea houd etj jiedre Lest von mienem Ounjetrüden futs ertjant. Na jo, wout brenjt dout nü seich doewa dem Kop tebretje, etj wea donn ewens noch en noutet Kolv, mukrejch en domm.

Nu vel Striedarie en vel Netjscharie von miene en siene Sied, hab etj nu 35 Ehejoare endleisch foustjestalt, dout ons menneschet Ete ons nejch blös tjletja, sonda wea houd dout jedocht, uck friedlejcha mokt! Dese Tatsache es dretjt motem Umfang von onse Heifte vebunge: je meija Heiftegold wie habe, desto friedlejcha woa wie!

Nü striede min Moun en etj ons wejen söne Tjlienejchtjete mest nineich meija. Nü brut jiedra siene Eja ve seich selwst. Etj ein Ej - mot vell Jemüse en gounz weneich enjekoackte Botta en min Moun – mot vel Schmolt, jeretjadet Schenjtjefleisch en Zeppe! Hei spead dochwol, dout hei noch sö mounjchet Ej ete mot, bot hei mie en Sache Intelligenz nuhult! Wö bekount, sat seich dout Fatt bie de Manna nejch sö houstejch os bie ons Frühes ope Heifte oun. Dowejen mot wie Frühes ons en Jeduld eiwe, en nejch futs de beledje Lewaworscht spele, wann de Manna mul wada Sprie rede öda Mest jebüt habe. Dout koun nejch jiedra sö houstejch ous wie intelligent woare!

En te göda latst, wann etj doaf, noch ein tjlina Rut von mie: vesetjt mul biem Ete moake te senje, dann jelenjt jünt dout Ete noch veel beta, dout garantea etj jünt!

En desem Senn – blieft jesund, kluck en friedlejh en lutet jünt schmatje!

### **Min Rezapt von jebrudne Eja:**

- 1 Ej
- 1 Paprika
- 1 Pemedua (oder 5-6 Cherrypemedutjes)
- 1 Zeppel, en betjstje ütjekoackte Botta, Solt, Pepa, Dell, Zeppelluck en Rosmarin.

De Poun mot ein betjstje Botta heit moake, dann dei en Stremels jeschnedne Paprika ounbrude, dotö der Rej nu de fin jehackte Zeppel en ous latstet tjien jeschnedne Pemedure dotö jewe. Oules kort ounbrude, dotö dout Ej schlune. Mot Solt, Pepa en Rosmarin würzen. Brude, botet nejch meija verrant, dann omdreje en nochmul kort ounbrude en oules ope Schiew jewe. Mot fien jehakten Dell en Zeppelluck (öda mot Enjefrornem) bestreje.

### **Rezapt von von jebrudne Eja von mienem Moun (sö ous hei sajt: ve achte Tjedels)**

- 8-10 Eja
- 200 Gr. jeren uck meija jeretjadet Schenjtjefleisch, wann tjeint es, jeht uck Worscht.
- 2 Zepple
- ca. 300 Gr., jeren uck meija Schmolt, Solt, Peppa

Schmolt ene Poun nenjewe, en schein heitmoake, det en stremels jeschnedne Schenjtjefleisch en finjehakte Zepple dotö jewe, kort ounbrude en de Eja eint num oundre nenschlune, sollte en peppre. De

Eja von eine Sied langsam ounbrude en omdreje, noch eimul kort ounbrude. De Poun opem Desch stalle en dei Eja dretjt üte Poun, sö heit ousset jet, veschlenje. Dotö wetet selbstjebacknet (te Nöt uck vom Batja) Bröt en dout Fat dücke en töete.

Göden Appetit! Lutet jünt schmatje!

© Katharina Fast-Friesen